

東洲草堂文鈔

東洲艸堂文鈔卷十五

道州 何紹基 子貞

壽敘

林母謝太恭人七十壽敘

士大夫服官通籍得以祿養其親爲厚幸矣然必兼以善養斯其境愈旨而名亦豐是爲無忝之正者況其親以賢德禮法視躬繕性因以教成其子則所以養志者尤不僅在用力用勞矣同年林笏村殿撰以丙申成進士廷試第一人及第爲閩中二百年所未有煜煜乎稽古之榮振聳一世越歲丁酉特簡充冊封琉球正使披一品衣涉萬里洋詞臣秉節之榮數十年而一邁禮成使旋

天子嘉悅載荷

綸言典試山左得士之盛望若龍門笏村願謙抑退損愈自刻勵以踐道篤行爲務側嘗聞其稟承所自則溫溫乎肅肅乎皆其母謝太恭人之教也太恭人幼率其父訓導公之教潛心理學涉閱羣書庭訓所傳女宗樹望願尤喜爲詩以溫柔敦厚之旨和衿纓珎璜之節有異乎浮藻舊豔與詞客才媛爭能者蓋其爲詩卽其習禮也卽其貞道而約性也旣于歸我丈人逮事其舅以孝聞於里鄰丈人客游以謀菽水養親課子惟太恭人是賴其課子也經書皆由口授又多述古格言及陰陽果報之理以開其智慧長其才識端其志趣不徒以文章富貴望其子而以碩儒名臣期其子雖古所稱韋母歐母又何加焉笏村之未第也屢試春官太恭人不忍促其歸輒以詩慰之逮丙申寄詩有云報道杏花消息近老親洗耳聽春雷若預知其捷南宮

而登上第者豈種德秉禮積久獲報有可以自券者歟宜笏村
渥荷

宸衷展膺

使命而踐道彌謹常如侍太恭人之側忘其身之榮名之隆也
即使他日爲

國建猷銘旂常而勒鼎鐘亦豈能有加於太恭人之所以教乎
今年孟春爲太恭人七十慶辰神明不衰手未嘗釋卷尙能作
小楷書於所謂貞道而約性者其功且日進古賢卿士耄而好
學因事箴儆者有之矣乃得之女宗吾未之前聞也丙申年家
子謀爲介壽之詞猥以屬基雖未與紗幔之傳亦冀遂登堂之
拜敢質言之爲太恭人進一觴焉謹敘

趙蘭友觀察丈七十壽敘

道光乙巳冬月五日爲吾蘭友丈人七十壽辰時方歸憩關東舊廬芒屨草衣與農夫樵子相儔侶同年友人及諸年家子郵書促來京謀爲介雅之觴顧以千里而近安於田里有塵視軒冕之意基竊疑吾丈人非遯逸者流且敷歷中外煒有名績又廣推解好賢樂善所交賢士大夫及公卿寒畯悉平等觀務如其意所欲得何以杖履翩然如鶴舉鵬息之不可近豈有獨樂其樂而不樂與人同者歟基有以知其非然也丈人中年成進士爲中書舍人遷起居主事以詞筆華敏晨夕勤勤宰相所倚任爲

耆廟所知至

今上在位之十年積優成陟出爲揚州同知連攝鎮江徐州揚州諸郡篆授淮安府知府凡所措注諸大端若辦撫恤倡義賑

勘丈沙洲地畝疏濬練湖水道籌銷秦壩鹽引訊結積年疑獄
絲勢棘擾一通十塞小心大體相幹相輔卒以咸濟既晉觀察
備兵淮海四載河干肇畫周密屢以安瀾上邀

褒敘因勒爲成書繼潘斬之後移節河庫支收必覈堵蔽夷艘
心力俱瘁值江南督撫大吏方倚如左右手遽以微疾解組言
歸如機斯發不可畱止猶憶壬寅之秋基由江南入都僑謁於
淮海道署丈人餉以盆蘭謂之曰吾通籍三十年官不可謂不
達志事不可謂不遂知足不辱知止不殆吾亦欲歸耳時余唯
唯應之不遽以爲實言也未逾年而單車幅巾相與晤言於京
師又未逾年而膏車秣馬言歸關東矣臨行執手見謂曰不一
年吾當復來京飲酒評書爲樂幸毋以契闊爲念吾蓋知丈人
其道如玉可璞而亦可琢也其迹如雲可舒而亦可卷也其視

並世之人皆可與同樂摺紳文人與農夫樵父其視之無以異也藏羣籍務多蓄古書名畫務精行文作字至老不爲率筆顧好與人言有問者指示無倦色愉心快樂而不滯其爲同樂也詩曰樂只君子遐不眉壽將及春和望丈人之來飲我酒也因書此爲遙祝之詞屬哲嗣迪齋心泉兩弟歸而獻之冀以發千里一笑也

呂母姚太恭人六十壽敘

呂鶴田給諫之再入都也旣補官方補修尊丈□□先生所著周禮古注旣已成編又屬余與張石舟覆訂之以付手民鶴田因益肆力於三禮注疏之學余過而詫之曰子於官事亦懂耶乃有此暇日治經何也鶴田曰一日讀書則官事治一日廢學則官事怠今何疑而見問也旣而錄其母姚太恭人之懿行

然成文以見屬曰稱觴有日幸吾子爲之詞也余受而繹之歎
曰鶴田之賢固由能讀父書也亦實稟母訓也太恭人事舅姑
克盡孝養鶴田以拔貢得高潭校官太恭人以舅年老侍於家
不至署鶴田通籍後奉尊丈入都太恭人曰居鄉之樂勝於居
官吾安之素矣竟不就養鶴田再入都太恭人諭之曰汝居言
職處事須老成毋妄言毋輕動仍不願北來也蓋其天性之澹
定不以奉養爲榮而惟以習苦爲樂所望於其子者惟望其爲
端人正士而非以撫仕崇階爲喜也蓋天性之澹定也如是鶴
田以乙未成進士出先文安公之門厥後由詞林入諫垣同時
與蘇庚堂朱伯韓以能建言有聲於時稱三御史今庚堂伯韓
俱告歸鶴田以正直雍容克揚其職方當外陟監司內躋卿貳
一攄其濟時之志固遭際有殊抑亦太夫人之刻勵敦篤厚蓄

而沛發之將食報於無既也歟余與鶴田爲同年爲通家兄弟
今十餘年矣吾母夫人以清德相先公蚤歲食貧晚雖貴盛勤
儉帥初今年逾八十布衣粗糲晏如也太恭人今年六十矣既
不欲就養京師家園游憩督婦輩植蔬蕘草話桑麻以爲樂其
天性定靜不以枯菀異志蓋與吾母同惟基與鶴田比年先後
失怙年俱強仕矣習俗頽放又時事方殷立身處世如執玉奉
盈日奉母教爲兢兢思貽令名宜無隕越勉乎哉勉乎哉鶴田
其郵此語以告太恭人俾知兒輩相與切磋砥礪者未嘗一日
敢忘老人訓戒也庶亦欣然而進一觴也乎

吳姓舫少宗伯師五十壽敘

道光二十有八年秋七月望日爲少宗伯攝少司農吾師姓舫
吳公五十初度之辰門人謀所以爲壽者哲嗣小舫世兄來述

師命曰古人稱壽不於誕日且半百之年未可言壽也同人咸以屬基日子於師也習盡善爲之詞冀或聽許也基應之曰是亦不可以已乎吾師少稟庭訓讀

賜書博綜傳注探究天人於名物象數形聲訓詁析疑得精拊本舉末尤貴以微言大義紹聖權明道樞乃視厥躬乃節厥性蓋厚其學以壽其躬也如是吾師廷試以第一人及第與其世父棣華先生壬戌大魁相距三十年爲一門盛事後十年已遍歷清華晉躋卿貳顧不知以位爲榮而以躬餉盡職爲務入直三天陳說經義歸於誠正溫樹不言德型曰著洎副春官凡有謨議援據禮經司馬司徒屢

命攝事無唯與阿民生國經諮度寤寐益思本其學以壽斯世也如是疊領文衡屏華采實乙未之使吾楚南也橫舍生儒聞

風摩厲購誦經史書價騰踊風學研覃之彥羅岡靡遺己亥之秋方視閩學適基以典試至秉昔訓甄樸學全榜百有餘人皆師所拔高第諸生及甲午典試所錄副車也逮視浙學端士習崇經術與汪文端阮太傅師後先朗映蓋本所學以壽儒術也又如是若世俗所稱壽者飲食宴衍以爲樂金石絃管以爲娛衣冠踴濟以爲盛宜非吾師所願聞也是亦不可以已乎雖然竊亦有說焉吾黨以科目列籍於弟子吾師則實經師也人師也敬之親之範之模之蓋期其爲望夷爲伏鄭而猶未以爲嫌矣卽半百之年載頌載祝謂由此申錫於無疆禮以義起詎曰非宜且吾黨侍側以來今十有四年矣初在湘中祇謁棘闈送行水滸迹猶疏也閩南之役基獲侍飲於學使署所謂三百三十有三士之享者諸君未與也嗣後直

內廷持使節計得奉顏色共尊酒者歲不逾三四焉今久貳春
官於六卿中最爲體大而事簡它日躋正卿陟樞輔吐握勤施
贊襄變理豈復有退食委蛇之暇如今日者乎幸藉攬揆之辰
大衍之慶秋月初盈涼風已至羣弟子相與揖讓雍容審鞞介
雅於以滌思請益宣志道情愷康一日爲權輿百齡不亦可乎
吾師乃蹶然而笑曰敢敬舉諸君之觴

方母葉太安人七十壽敘

昔歲壬寅之春余小住金陵時同年通家方伯雄太史侍其母
葉太安人於家常徒步冒風雨行意氣如書塾童子色問之則
曰母命往姻戚家也或曰暮友人畱飲食畱宿則必辭曰母教
無事徵遂不敢違命伯雄旣入詞林久乃遲遲不欲供職太安
人強之入都以迎養請太安人安於鄉里不願居京師伯雄遂

子身至都不以妻子俱館於同里陸氏寓園課徒爲業如秀才
時入直史館寒暑不自休息嘗謂余曰吾母之不願就養也以
詞曹米珠薪桂長安居大不易又詞垣冷官誠不願益其累耳
陟岵之思望雲之感何能以已乎余應之曰子之言是矣顧吾
聞太安人自于歸先丈□□先生久歷寒苦不自知其勞瘁今
雖年屆古稀矜悅穆穆神明不衰衣布食蔬率諸子婦灌圃觀
稼笑語爲娛諸子婦亦相安於里巷絕紛華太安人誠有所樂
之豈徒慮重子之累哉深山之中古柏叢竹冰天雪地不拙其
節春榮旣滋眾彙欣欣怡悅願盼而柏竹之性視寒令亦茂悅
矣而澹靜疏闊亭亭兀兀不因風妍不爲雨妬本性然也太安
人家世甘泉居邵伯埭江海秀澤少時孤露茹荼如飴歸先丈
□□先生於金陵都麗繁富習俗嫵佚閨闈之習尤憚作勞太

安人佐夫食貧扛曰行汲數米裹鹽越數十年不自知瘁子女
粲然成行雖撫愛臻至而慈不廢教饁耕舉案之風丸熊畫荻
之訓匪惟兼之殆於過已以況母德不其似歟伯雄之在史局
職司既勤資望亦深內躋坊局外握文衡又或□□□監司計
旦暮間必有一得板輿迎養之樂綵衣環集之慶侍慶方長天
樂何極福之所鍾德爲之券吾子雖暫爾睽定省益當勤職事
慎交游邀

國恩而報慈訓勉諸弟業儒者劬於學兢兢惴惴以待遭際之
隆太安人聞而樂之忘其老而健返福壽於無疆不亦可乎

徐笏亭先生暨配羅太夫人八十雙壽敘

余昔應南闈試旅寓長沙艸笠芒屨尋碑訪古殆無虛日劉廿
丈語余曰吾黨有徐君耆勤肄書能收藏先賢墨蹟子亦欲見

之乎余欣然偕往適遇雨持傘造門庭院蒼蒼滑澌不能跬屐
齒主人肅客入煮茗快談洒埽潔清詞氣詳雅蓋卽我笏亭先
生也旣出帖畫數事其賞析令幼子出見年十五六恂恂侍立
已作孳稟書莊重開拓落筆不凡藉知其門風之善庭誥之肅
心愛敬之逮歲甲午哲嗣雲渠以優行貢成均吾弟子敬舉鄉
試爲同年乙未先生女夫張雨農捷禮闈雲渠考取官學教習
皆出先文安公門下雲渠旋雋秋試又與余爲同年同官京師
朝夕諧際益習聞先生視躬督家善處鄉里竝哲配羅夫人孝
姑敬夫躬率子婦修內職仲嗣俞臣隱居侍奉見義必爲飼飼
一室所以著令聞於桑梓者甚備雲渠者卽能作孳稟書之童
子也入詞林改官內閣日習院體書書未能進於古余甚惜之
又數年哲孫壽衡爲庶常余爲教習師其作官韻賦甚敏捷議

三考游由 恩蔭生通籍從政兵曹積優成陟督糧於秦督餼
於齊魯敷歷中外將三十年非初服官政者比哲嗣子良少年
掇科第官比部君非有職司則封君也老成先達也何不可言
壽之有子良不供職於京師隨侍君官署頃復以事歸福州鄉
里余每至嘉蔭堂君輒出鼎彝書畫相與掀掌攷訂香溫茶熟
有琅琅然書聲達於戶外者則君之幼子童孫也俱年甫勝衣
未能應客於稱祝蓋非便況今世稱祝者多無詩而有敘敘則
必臚列其文行功績圖妣觀聽尊庭先丈人以詞林宿望受
三朝知遇外厯封圻入爲大司寇名德崇偉至今在人耳目君
早秉庭誥曾以京兆試冠南軍旣以隆莛得官感念

國恩諳勤職業彌務斂抑喜揚人善惟恐少自衒襮蓋謙樸不
伐其性然也且朋友之道在切磋講習鋪張聞望藻耀屏壁雖

無飾詞迹涉標榜何所取哉屬山東苦旱禹舫中丞率屬齋戒
致禱於岱頂之龍洞兗州之靈石邯鄲之鐵牌焦鬱者兩月
至仲夏望後甘澍屢臻千里優渥君方重葺署後也可圖及蓮
子湖古厯下亭工適告成同人得藉以遣懷推美於君中丞作
喜雨詩君與竹如方伯芟鄉觀察皆和之余頻和未已因復疊
前韻爲介雅之詞同人亦咸有繼聲君於是顧而樂之乃舉樽
屬客曰今日之酒爲喜雨設也客皆笑應曰諾時咸豐九年季
夏月哉生明賓君五十初度日也

徐柳臣廉訪七十壽詩敘

憶余十六歲時當嘉慶十九年甲戌先公官少司成十八行省
癸酉科選拔生肄業成均者彬彬然執贄門下余得盡識其才
儻爲余有交游之始時江右二徐文名藉甚則吾柳臣前輩與

哲兄穎墀也計偕至都卽從先公問業嗣皆以廷試高等分
職星曹聯璧嘉譽溢於輦下穎墀遲回平進階秩不顯君聯翩
成進士入詞林典試山左分校京闈旋以供奉進御文字領司
清祕潛神覃思與俗殊好靡術不究才望苑特凡所譔擬有劉
單典籥之風權白制誥之遺臨池精敏與其鄉先輩陳玉方侍
御李春湖侍郎書名相埒性坦易寬簡不設城府余及弟子毅
子敬子愚尤以通家雅故婉變狎習余性故迂樸復以詞館後
進勉自芴敕弟輩則忘形忘年伉爽之談嬉娛之致君雖道廣
善交於吾昆季視它友加摯焉誼重緣深彼此蓋不之覺也詞
垣最計出守潁州移檄安慶奏署皖臬擢巡東道遷山東臬使
凡所肇措寬猛必衷欣慄交感其彰灼在人聽覩者在潁州開
霍邱縣八里塘五十里之淤河三旬蒞功歲增種麥數萬石攝

皖臬時有夷警輯游民修城陰勒以兵法創製竹牌及它戰守具精奇出古法外迤東廣西州沙夷句結儂人將起事輕裘簡從徑入夷巢諭以威信遂縛送渠魁夷寨數百並以保甲編之百餘年伏莽如掃秕糠官民皆驚爲得未曾有大理回倮方熾計其時避瘴將遁伏銳師於歸路三戰三捷軍威遂振蒙

恩賞戴花翎山東捻勢縱橫立連界合捕之法計戢根株章程甫定被議去官粵匪擾及南昌荷

特旨襄撫軍防堵募水勇規守禦省垣被圍九十餘日賊受創解去所練銳勇會同各軍收復郡縣毀家輸餉至無餘積含謨吐忠

帝用嘉之寵復按察使銜人人知將起用顧恬然高致戢影蓬廬不復與聞時事矣久在史館溫溫無所試見侈談經濟者默

不答一語一鴈外吏糾紛槃錯則奇智碩謀如兔起鶻落如風
電之相屬所謂不由師授忽自得之者歟抑祕而蓄之者素歟
余蒙以書法相砥厲門徑不能強同然君筆法深造人書俱老
尙能懸腕作蠅頭字余則臂力已頽使轉怯乏有退無進望塵
知媿已君歸里後余每過豫章必握手道故已卯冬余以蜀學
使罷歸在秦中度歲長郎韵泉候令過從譚菰得聞里居安狀
甚慰今年春仲薄遊羊城道出韶州叔勤世講方令曲江君來
就養意外相逢閭署俱爲狂喜臨別屬曰余年七十有一矣五
十年文字至交無逾吾子能贈以一言乎吾多蓄陳耐傾所有
以相遺山光水色中月滿尊前句來天外如與故人晤對也旣
至粵寄寓潘德奮海山仙館木棉已謝荔子方花游蜂繞牀日
作吟哦聲午雨驟涼案頭枯木硯亦生滋潤欣然有述兼綴以

詩歸舟過韶當付叔勤兄弟讀之爲老翁一笑之樂也

丁母口太夫人九十壽詩敘

自古名臣鉅儒多由母教或者疑之應之曰名臣鉅儒之生乾德所鍾坤厚先稟理固宜爾誠不能數數然也今大中丞江蘇撫邵丁公由明經爲學官爲縣令膺

特簡觀察蘇松都轉兩淮遽陟少司馬巡撫吳中適三越寒暑太夫人年屆九旬官署奉養愉愉秩秩顧門庭樸簡如在鄉井吳中浩穰夸麗自昔爲行省最而太夫人以勤儉率先於上習俗爲之濡染震動潛移默運有不自覺民間見中丞所設施祛華黜浮敦本斥末謂欲以斲雕破觚培養元氣救數十年凋翅瘁瘠之病蓋有深思遠慮焉詎知其根巨門內任性自然非有所矯持擎掇於其閒也四牡之詩曰不遑將母申之曰將母來

懿祈父之詩曰胡轉予于恤有母之尸喪教忠之稟自慈訓風
斯古矣若丸能封鮓斷慈盡荻非皆其後焉者乎又詩之豳頌
曰躋彼公堂稱彼兕觥萬壽無疆言豳公設此朋酒飲酒既樂
豳民欲其大壽無竟也又七月之篇一則曰同我婦子再則曰
嗟我婦子今之中丞卽吳中之豳公也婦子被其澤者深矣沿
流溯源叩枝尋榦非太夫人之教所敷暨者博乎今日升公堂
介大壽蓋非屬吏之私情而百萬蒼黎之大願也基於五年前
以是日爲中丞作絜園記忽於七旬而外爲數千里遠游載逢
介雅之辰獲與稱觴之慶豈偶然哉豈偶然哉同人謬屬爲隍
引之詞遂欣然點筆而不及以老憊辭也

家母廖夫人七十生辰徵詩文事略

家母廖夫人家道州西鄉小坪村世業儒而且耕自幼時智慧

多能勤力持正母黨咸師之方許宇族中人以家君少孤寒苦竊有疑議外祖父曰焉有如某郎而長貧困者乎後如其語至今州邑以爲美談旣于歸井臼勞猥佐家君讀書授徒束脩所入善節齋以備不虞嘉慶辛酉家君以拔貢入都供職銓曹母攜三子就外家居鞠育勤苦一日襁兩兒往山中拾薪掘筍簞稍拂左目成障翳漸至失明遂不獲愈歲乙丑家君及第歸攜偕北上京居操作如在鄉里家君雖貧宦多友朋文字之樂杯酒談讌母手自烹飪必求豐潔內外親疏皆不知其貧也家君視學山左浙江皆隨往庇家政逮位望日隆祿入稍豐母布衣補綴銀簪不華未嘗少改三品以上俸米皆精鑿閒以糲米數石母令不糲而食曰粗糲不可忘也京寓有隙地手植蘇莧酒醬醢蔬皆出自製終歲無一日缺家君每食非醢醢不能下咽

兒婦輩效爲之終不似也力能扛重每日晨起率婢媼於庭院
操作浣濯盛暑嚴寒不避暇復鍼黹紉縫無暫息以及事舅
姑遇家祭肅潔感愴事家君恭抑老而彌謹教子婦慈而嚴不
敢有私財物不好華侈游戲親連約宴飲必固辭不獲乃往園
以內不及外事門生故人子非堅請不見見卽布衣出詞氣質
樸數語而退周急濟困常如其事不可枚舉潛於名利值
家君公事焦勞輒以告歸爲請兒輩馳逐名場南轅北轍每諭
以得失有命但當善保身而已以家君貴
誥封至一品夫人恭遇

皇太后萬壽

皇后冊立慶拜宮錦之

賜子四人紹基紹業紹祺紹京孫四人今年六月七十壽辰敬

乞鴻筆賜之敘言以爲介觴之佑不勝榮幸

家母廖夫人八十生辰徵詩文事略

吾母廖夫人世居道州西鄉有月巖五星墩濂溪諸勝周元公故里也母氏幼而奇慧鍼黹操作爲族黨女師時先文安公甫成童爲諸生孤露困苦外祖旣相攸族中人咸嗤笑之外祖曰是非兒女子所知也于歸後佐先公食貧攻苦每歲課徒所入束脩三四十金善積儲使有餘爲調恤費有饑肉者則脯之以待伏臘孿生紹基紹業兩兒未三朝卽襁兒出汲力能扛目作苦倍他婦嘉慶辛酉紹祺甫生先公以拔貢入都母氏攜三兒育於西鄉舅氏當襁兒入山采薪竹萌拂左目遂成障翳先公百計延醫治之卒未愈先公朝考一等爲吏部小京官寄銀信歸母氏負苦如昔若罔聞知乙丑先公成進士入詞館假歸

始以命服迎母氏於西鄉州人至今以爲榮也入都後操作不
倦如故先公官翰林謄十年不得一文差而會友銷寒賞春詩
酒之局月謄數聚烹飪果餌母氏親爲之弗倦也先公官旣貴
先後視學於山東浙江母氏皆同往試畧稍得節勞而布衣浣
濯至今未嘗御紵綺兒婦輩悉安其教不敢爲華侈也惟蕎麥
疏糲等物食之最甘而齒不損則非兒及婦輩所能也以不及
逮事舅姑歲時祭祀致誠致敬佐先公悲泣先公於庚子春棄
養兒輩服闋後由金陵奉母入都京廬逼窄祿入不能豐於養
而繞剝孫曾含飴自樂甲辰夏下階失步傷左股內外治皆不
效遂不復於行僅能扶几案步於房中幸眠食無恙精神健甚
也教兒輩極嚴於功名得失惟以安命爲訓今年六月爲吾母
八十生辰先公門下士咸謀爲介雅之詞謹次大略以備采摛

陳母楊太恭人節孝贊

并敘

咸豐七年丁巳冬十月余僑寓濟南濰縣陳君介謀肅書幣至乞爲其母篆題

欽旌節孝之坊并爲文以壽之其書略曰吾母太恭人楊氏邑之望族年十七歸先君朝議公十九歲舉一子先君溺苦於學才不偶命遽以諸生終母年甫二十二痛不欲生遺腹復舉一子逾二載兩兒相繼殤痛哭曰未亡人不卽死爲一縷未絕耳今至此何以生爲家人晝夜環守舅姑諄諭以大義始雪涕曰何敢重違乃以夫弟之于介謀爲嗣茹荼抱父四十餘年旣由臺吏甄訪得請於

朝奉

俞旨予旌建坊如例介謀蒙顧復教誨不敢少有佞越貽先人

善哉母氏訓也母年今逾六旬刻厲自持猶與婢媼同操作幸
健甚嘗獲大年冀吾子復聲之以文詞感且不朽紹基自成進
士入詞林協揆文愍公實爲讀卷師而丈追隨既聞家世又與
哲嗣介祺同年舉鄉試以金石文字相賞析益習聞太恭人之
苦節朝議公者文愍師之弟也介祺復以書至曰昔桂未谷先
生至敝邑爲族中節婦製文素紙朱方闌書之傳爲墨寶今吾
子惠然有來爲明湖鵲華之游家叔母潛德其待椽筆而益永
乎余媿弗敢承顧義不獲辭旣爲大書其坊額曰

勅旌

覃恩貤贈承德郎翰林院編修加二級晉贈朝議大夫邑庠生
陳官傑妻室貤封安人晉封太恭人楊太恭人節孝之坊謹復
濡筆而贊之其詞曰

婦道重節節以孝始太恭人孝吾聞稔矣侍母湯藥夜恆數起
閱十二年不它人委爲陳門婦移孝於姑高堂百齡姑歡婦劬
門庭貴盛珪組踰趨娣姒勤勛相忘苑枯并年早孀雙嬰不育
壹秉堅貞克延似續義方教子父書能讀焯學殞生彌其不足
表海之邦賢相之門

聖人孝治含章在坤

綸言露灑綽楔雲騫介福曼壽流慶來昆

東洲堂文鈔卷十五終

東洲艸堂文鈔卷十六

道州 何紹基 子貞

碑志

黔陽縣教諭陳文亭先生墓表

大人命代作

先生諱學奎字文亭世爲道州人少有至性事其父聯清公以孝聞每視寢必揖且祝願得安眠也撫其弟學關友愛甚篤童年卽理家政秩然肅然究心文史遂以名諸生食餼由歲進士得爲學官初權攸縣學旋補黔陽縣教諭課諸生以敦品健學一如其自爲黔固邊隘地先生在任十二年而文教莊莊益盛生平以善爲樂修置俎豆興復古蹟若是者不可枚舉解組後家已不貧諸子皆勵學成名孫曾繞膝十餘人課耕且讀刻苦如秀才時烏乎可謂篤行敦本君子矣以道光六年丙戌二月

十五日卒距生於乾隆十四年己巳十月三十日年七十有八子四人長嘉謨次嘉訓候選從九品嘉誥嘉議皆邑庠生女三人孫男八人孫女五人其一爲余三子紹聞室曾孫三人余故與先生爲忘年交憶甲子歲同寓京師風雨連牀恆抵掌論古今時事皆切要有條理其慷慨激昂之氣至今追思猶宛然如昨也氣誼旣篤又申之以婚姻故知其言行甚悉敢表其略以眠後人

道州廩生周君雪案墓表

大人命代作

君諱克映字雪案武庠生輯五公之孫庠生遜公之子也事親以孝聞居喪疏食水飲苦出泣血人至不忍見聞識禮者歎慕焉少銳於學年十八補博士弟子三十食餼屢躋省闈卒不克售遂絕意進取而一意以課子爲事故三子皆莊莊有成生平

勤樸尚義吾州中如重修文廟勸立考棚皆與董其事爲眾所
尊服少壯與余交甚諧際余官京師一別十六年而君長逝矣
惜哉君生於乾隆戊子某月某日卒於道光辛巳某月某日年
五十有四葬某山之原子三人錫祉錫祐錫祜女一以妻我十
一弟凌泗錫祉等書來求碑其墓謹表其大略焉

許氏玉照山新阡表

錢唐許乃宸等既葬其祖妣及其考妣於畱下鎮玉照山之原
請曰自吾祖開仕君悌友敦篤同祖兄弟口人駢穴而葬葬後
廿五年而祖妣葉安人卒更卜葬地則奉吾父辦香君母趙太
安人耐窆焉是於禮亦有合乎應之曰母從子也子從母也妻
從夫婦從姑也其於禮也若合符抑聞安人以勤儉佐開仕君
君既早世教子成立辦香君力學植躬以孝廉爲校官未竟其

志今編修君乃安乃以名翰林榮逮兩世其有鬱而必光久而大昌者歟葉安人年登九秩趙太安人事之以孝稱道光十七年三月謹表

開仕君諱口國學生葉安人生於雍正戊申卒於嘉慶丙子辦香君諱學曾乾隆壬子舉人武康學訓導生於乾隆乙酉卒於嘉慶庚辰趙太安人生於乾隆乙酉卒於道光癸未開仕君子一人卽辦香君孫五人乃宸乃安乃憲乃寬乃常乃憲早歿附瘞於新塋之側曾孫六人馥身慶身廉身綺身觀身緯身

湘鄉蔣氏先墓表

蔣薌泉由廣東巡撫因公左遷授山西按察使時秦晉之間有防河要務

中旨敦促赴官薌泉適以在軍積勞成疾請假乃回籍葺治先

塋一日酌我於柳陰書屋忽痛哭跪請曰益澧之生不及見先
大父母生祖母周太夫人青年守節撫孤疾革時諭吾父松林
公曰它日汝夫婦必耐我墓松林公既葬生祖母於塘灣合塋
山迨松林公棄養益澧與弟益清賴吾母潘太夫人教育劬勞
支持門祚葬松林公於周太夫人墓左會粵西寇起益澧投筆
從軍不遑將母潘太夫人之歿益澧方治軍於鄂歸葬母於周
太夫人墓右遵遺訓也今修墓事竣乞表其墓道之石余維鄉
泉之祖之翰公諱湘墉與伯兄湘培叔弟湘城季弟湘垣皆以
高才篤行有名於乾隆嘉慶間傳有莫如樓詩文藻時稱湘鄉
四蔣雖先後擢科第而懷抱闊遠俱未獲一紓於世鄉泉年未
及冠應同邑毅勇侯曾相國之召慷慨殺賊轉戰各行省疊擢
府道補粵藩移浙藩晉撫粵東凡所設施皆本血性至誠雷轟

雨沛一洗因循塗飾之習武功吏事傑特烜赫一時無與倫比
謂非其先世潛光孕奇所鬱而必發者歟薌泉先以克復粵西
郡功

恩予三代正一品封典嗣因積累勳庸疊膺黃馬褂騎都尉世
職之

賜今年才三十有六將來病起出山所以展先緒而侈

國恩者蓋未有既也其叔祖□□公與先文安公爲會試同年
薌泉念通家誼侍余甚謹嘗謂人曰貞丈不可及處止是事事
平正耳烏乎余以不平正被世訾警久矣乃辱阿好如此敢不
媿且勉乎附及之以見其克敦故舊而余今日所以表其先隴
者益不忍以老憊辭也

福建興泉永兵備道熊君墓表

天下十八行省京師五城及 欽交訊辦凡刑獄重大者悉歸
刑部刑部十八司司員至數百人職其要者爲秋審處直秋審
處者數十人握其綱領者不過一二人是一二人者必其明敏
決斷諳習律例及成案駁案能辦本末齊輕重佐大司寇贊
聖天子持天下之平者也近十年中刑部之任是者都中眾論
僉同曰無踰熊君子謙子謙入刑曹未久卽襄辦秋審處旋充
總辦其定讞平反事無日月無之大約精詳善斷下筆後人不
能易其一字凡能治獄者多刻君獨以寬厚稱屢與上官爭論
上官皆心折服之倚如左右手 欽使出治行省獄屢奏請挈
君行輒爲大司寇所持最後遂以君名入奏稱刑部需人辦事
請無令與出京讞獄事

上由是知君能可大用乃甫蒙

簡擢遽從怛化嗚呼豈不惜哉君諱光大世爲湖南零陵縣人曾祖希賢祖□□父□□妣鄧氏祖考皆封贈奉直大夫妣皆宜人君早喪母刻苦勵學尊人故長者艱於治生家益落時已三世居長沙乃變產得十餘金令君與其兄光炳昌華各持錢五千自爲生計兄弟相持泣君徒步歸永州蔣徵士濂方主書院講奇其才爲助薪米肄業遂冠郡試補弟子員食廩餼道光元年辛巳科中式舉人癸未成進士籤分刑部主事戊子丁父憂時元配楊宜人及仲兄皆歿於京師君持三喪歸葬艱苦百狀服闋充秋審處總辦律例館提調癸巳補提牢廳甲午補山東司主事乙未升廣東司員外郎丁酉京察一等升江蘇司郎中戊戌秋七月擢福建興泉永兵備道將之官以十月初七日卒於山東滕縣舟次距生於嘉慶二年四月初九日巳時年四

十有二配楊恭人繼聶恭人皆賢而能子啟詠啟諧啟諧早歿
孫韓生以二十年十一月葬於長沙之塘灣其明年紹基等奉
先文安公喪南歸相地河西過君墓而哭之文安公既葬君兄
光炳來視我於墓廬泣而言曰知子方廢業不事譔簪然非子
誰文我子謙之碑者余答曰子謙官京師事先公如父行視吾
兄弟如弟晨夕過從譔議世事先公勛望之甚至知其才具德
性實足以任重遠也先公聞其卒哭之慟踰十有五月而先公
薨鄉郡蕭條壯老同歸忍淚敘此志我先公賞契之不虛亦藉
塞吾子令原之痛豈曰文哉

贈資政大夫王公墓表

歙縣王以和先生以乾隆五十一年卒於潞河年三十有一厥
配方夫人守節撫孤以道光二十一年歿於里居年八十有四

逮孫茂蔭貴君得贈奉直大夫妣宜人又晉贈資政大夫妣夫人於是距合葬之期十有七年矣茂蔭以墓道之石闕然無文以屬其同年生道州何紹基謹濡筆而表之曰君諱槐康字以和歙縣杞梓里人系出唐江南西道仲舒公後仲舒者初爲左拾遺與陽城同奏阻裴延齡爲相者也始家宣城嗣遷歙宋仁宗時以孝友信義旌其門隱德勿耀至君之考洪烈中武舉人以侍親疾終身不與兵部試君少讀書通敏家旣寒窘思負米養親從族人習賈於京師每歲浮海往來積奇贏以供甘旨不避風濤而卒亦未嘗遭險居喪不少離苦次鄉人稱異之後置產通州竟病逝於羈旅超曠之姿本於性孝天不假年如之何哉時方夫人年方廿八誓以身殉娣姒奉杯茗環跪始飲泣起先後善事祖姑及姑皆年登九十姑歿時夫人年亦六十矣婦

姑猶擁抱而訣也既失所天兄公等書二百金券爲養孤計始終弗受坐不正席足不踰牀飲食不與人共釜爨其兄步光爲作生傳曰吾妹之守節不可以常情律至親如兄妹不時不見與嫂氏惟見於堂不入我室今年逾五十戚戚然凜凜然如初喪蓋紀實也烏乎朱恭姬陳孝婦無過是矣丁丑

旌表命下母曰吾數十年苦志初不知有此等事但懼一念差忒它日不得爲神耳子應矩孝友睦婣力肩善舉因母節得旌凡戚黨節孝次第爲舉報所表著者數十人錫類之思非是母不得有是子也孫茂蔭茂蘭茂茹茂藹茂蔭幼失恃鞠於祖母故事祖母如母既由科第起家備官農曹轉秩諫垣以屢上封事論人才得失及時事可否被

天子特達之知驟擢少司農轉少司馬學術風采著聲中外固

其自致者特殊抑亦先生篤摯之性暨夫人堅苦之節有以培之也是可表也已

江南河道總督張公墓志銘

大人命代作

道光十三年春江南河道總督張公以疾請開缺既俞所請以後任未卽至仍

命署理其年秋得代回籍十五年四月卒於陝西省屬孤子漢以狀來乞銘按狀公姓張氏諱井字儀九號芥航一號晴棹晚自署畏堂世爲鄆州中部縣人曾祖聖教祖續周父元杰皆以公貴贈至資政大夫妣贈夫人公以嘉慶戊午舉順天鄉試辛酉成進士授內閣中書改歸原班選河南正陽縣知縣晉知州銜調祥符縣升許州知州署彰德開封河南府事升署汝甯府知府道光四年

特旨諭大吏舉實心任事才可大用之人中丞程公以公名薦擢開歸陳許道未抵任

命以三品銜署河東河道總督旋實授六年調江南河道總督公知許州值蘭儀漫工佐理局務時馬營壩工甫竣大役迭興上下交困乃詳議卹官卹兵卹民卹夫各事宜當事弗能用後臺諫奏劾公獨不與吏議彰德歲有漳患公以漳河本從三臺經臨漳成安館陶入運勢單行捷自乾隆閒南決乃挾洹爲患宜修復故道仍令北行當事未卽許也已而北決公謂其機可乘力申前議事果得行漳流大安時已守汝甯矣蘭儀柴壩日危前帥嚴公議以碎石拋護而河南土性兼沙與江南殊疑未能決公至獨斷請行工臻鞏固其奉命調南河也實因創改河之策

聖心嘉許以爲當必可就特移節以便籌措卒以有所格而不
行在東河時請徧閱河道乃自商虞南下測量海口其水視迤
上各廳爲淺而寬廣倍徙以寬乘深並無阻遏南河之病實自
桃南北至山安海防地界節節高仰而距海尙遙難於掣跌外
南禦黃壩積歲淤高豐蕭以下各閘壩又以歲工圖便目前輕
於啟放水分溜緩沙壅河心復因道光四年禦黃未堵倒灌入
運溜愈分而河愈高事勢之窮當思通變查安東縣東門工以
下地曠而窪愈東愈下若由東門工別挑河至八套以入海以
今北隄爲南隄而別築北隄河直則溜舒黃水落低則清水暢
出利漕省防爲利甚溥

上旣深然其計調任後以所見與制軍齟齬不獲行旣不欲以
悻悻去則勉從時議啟放口壩挑口舊河乃下河傷損實多而

竭蹶工次自八月至七年三月壩甫合而溜已滯矣

上雖以是重責公而亦知非其罪也海口攔門沙巡河所不至也公乘舟親勘由長隄盡處復東行約四刻許南北水尖均已不見舟人云是攔門沙矣刺潮測之水深八尺計潮退當四尺耳有老漁父云自乾隆至今水勢止於此惟海灘接漲海口益遠沙亦外移公曰沙有轉移確無阻阨河病果在中滿乾隆時有海口水深四丈之說知其誣矣命棹益東舟人云近聞王鼻不可測也乃還時白日將落水天浩渺風浪擊撞方構思作汎海詩也據實入奏

上甚嘉之揚河舊設四壩入海而路遠必淹經七縣而始達揚糧各壩入江而路捷嘉慶以來因江淮黃多同時異漲乃兼放歸江歸海各壩公持乾隆故事堅守四壩而民農竟以不傷道

光十一年江水浸淫兼挾霖雨上游各省均已成災於是馬棚灣十四堡兩處漫溢洪湖高郵湖水勢益劇方飭啟四壩而風雨狂突壩坡潰隄直由下河入海矣公既自請嚴議其漫口俱逼近荷花塘軟淤難以施工馬棚灣水口過巨費土難尋石塊卸壩阨隍無根乃於臨湖越作正河兩面築攔河壩月餘工畢帑用不糜糧艘回空繞湖安穩議者先皆不能測也○家灣奸民陳端等圖膏其田掘通大隄以致全黃入湖而河南河沁洛同時長水河湖劇險百出官民力請攔湖壩公以彼處跌塘太深恐成巨浸毅然不許且曰倘有不虞以身殉之不相累也寮吏失色晝夜籌築未三月而各工俱還其舊人益服其膽識云公既以長於治河受知

聖主破格超用值河千連年多事屢奉譴訶而

聖心倚眷久於其任恩禮弗衰公不能盡行其志而拯危導滯
洞察機宜其犖犖大端已不可勝書矣非才識異人又赤心幹
事而能然歟生於乾隆丙申年六十配田夫人子一卽漢縣學
生銘曰

公涖郡邑先鋤非種以安善民又善治獄日數十事咸斷厥勢
蓄經世書萃古金石振筆萬言

天子大智用其所獨命爲河臣改河巨議雖不果就

帝知公勤修河渠書撰能吏傳采我誌文

兵部左侍郎史公墓志銘

大人命代作

道光十六年九月兵部左侍郎史公以疾乞解職越明年二月
卒於京邸其孤炳笏持事狀來乞銘泣而曰是府君所自著也
臨終以授炳笏曰姑存之使後人知吾出處大概不必再爲行

狀致有過詞按狀公諱譜字荔園先世自洪洞來山東占籍樂陵世爲望族冠冕代興祖易齋公以孝廉仕至江蘇海防同知父董亭公隨侍生公於上海任所年十七舉於鄉三十成進士改翰林院庶吉士充文穎館纂修授編修充國史館纂修補浙江道監察御史轉戶科掌印給事中擢浙江甯紹台道調糧道升兩浙鹽運使未至授江西按察使雲南布政使丁母憂服闋補陝西布政使升巡撫調貴州巡撫內轉光祿寺卿升詹事充日講起居注官升內閣學士兼禮部侍郎銜授兵部右侍郎署兼管順天府府尹事務署工部右侍郎轉兵部左侍郎公在翰林時恬愔好學根柢日植入諫垣章六七上皆求其可行無弊者如嚴懲越訴及調劑五城貧民棉衣此至今循辦者滇中銅務自乾隆閒例撥工本運腳銀百萬兩厥後核減二十

餘萬兩銅政遂艱積爲巨虧公籌畫明審力請撥如舊額始免支絀在秦中值西寇起以藩司兼護撫鎮篆籌餽餉恤差徭軍民兩便之南山屢獲有秋謂平陂往復事理之常乃預謀荒政果值大澇捐廉一倡賑務立舉余識公自未第時後成進士爲同年竹柏之契垂三十餘年自其典試廣東湖北巡視北城中城天津漕務旣所至有聲出爲監司洊領封圻察吏愛民聖心倚任內陟卿貳操履持正清望益崇乃其事略犖犖可述者止此忠敬之道恭抑之德於是乎見矣公生於乾隆四十一年年六十有二配李夫人杜夫人子皆不育以弟誨之子炳芻

祠銘曰

公修家乘采墜理紛先三世墓文碣其阡誦芬述德孜孜甚勤奉職中外敷歷敷宣建言行事名立實存具於官牘吏寫手煩

顧其自錄廬是數端將使後人何所紀焉按繹闢布在賢子孫
烏乎荔園是爲可傳

羅君笑山墓志銘

同郡東安羅澍昀菽甫由拔貢生校書武英殿以勞敘官將
爲廣文以去臨行出手藁泣示我曰此正六之伯兄笑山先生
之行略也予與笑山有雅故幸爲銘其壙石余謹受之不禁悽
然憶與笑山共話鄉里時及笑山旣卒同人知其友于甚摯匿
不以告菽甫情事如昨日耳豈意彈指閒已踰十年也哉君諱
正春字錦山又字笑山曾祖嵩南邑庠生祖定國嘉慶中恩
賜文林郎父國珍字致用以字行號庚峯庚峯君有丈夫子六
人笑山其長也庚峯君少訓子也旣申以庭誥又務得名師延
曾先生俊卿教之作文神先生之斗誨之作書兄弟六人皆同

師笑山獨以勤厲溺苦於學值嚴寒圍几以衾僅敗絮足紙窗鐵研往往徹旦以是文字俱精進仍爲諸弟師法焉年二十三以郡試院試俱第一爲弟子員越十三年與執甫同受知於學使今大司農祁公執甫以拔萃貢成均笑山始食廩餼蓋自庚峯君棄養笑山以家督庀家政延師模範諸弟日望其有成於門庭里鄰閒恭敬周密善士之譽日起有聞後付家事仲弟而自課羣季不自輟學而心力亦已瘁矣性孝友居喪能違俗從禮治家尙嚴弟娣輩咸畏之稟承不敢怠修族譜葺墳墓仁孝之心赴以慙懇雖終身伏處然其存於中者有根柢行於事者有經緯使得尺寸柄以攄發其懷抱豈可量哉豈可量哉君生於乾隆五十六年正月卒於道光十三年五月年四十有三娶蕭孺人繼娶譚孺人子添鑑廩生添銳出嗣君之嫡堂兄正

開濟鍾女二長適彭次通謝世悲憫人仕孫男女八人自以若卒
後之年某月日卜葬於袁家阡之祖塋銘曰
治家有法政所始敦行不怠文愈美古重秀才今也靡聞笑山
風可以起

趙君元配鄧宜人墓志銘

道光二十有二年冬十月余聞同年友趙平山楨生喪其配往
弔之平山累欬而言曰吾雖官京師以貧不能置婢媼吾室鄧
宜人素耐勤瘁昨產子值中夜猝出不意時天霜皓然寒氣入
帷帳吾急爲然炭煮藥宜人方自裹其兒若無所苦豈知中寒
已劇一時頃噤不能言遽溘然逝所產兒無所恃以存於次日
亦夭歿平山言此時淚簌簌下余聞之亦感愴不勝不復能相
慰藉也越明年平山將送其喪歸來語曰宜人諱嬭爲直隸州

同知鄧公紹勳之孫女廩生大林之女年十八來歸素嫻禮教
事堂上能得歡心井曰紡績皆躬任勞苦大林公歿後家中落
宜人盡以其嫁時簪珥衣服嫁其同產之妹余自丙申成進士
官戶部主事其明年宜人至都衣布飯蔬相刻勵如昔時以不
能迎養二親每歲節縮俸入寄歸付兄弟爲菽水資宜人恆代
爲籌措俾不闕於供其安貧而不忘孝於婦德宜有足錄者子
其爲之銘宜人以嘉慶十年八月二十日生以道光二十有二
年十月初四日卒子公□女二銘曰

儉以養廉士所厲勤苦致孝婦也制烏乎宜人逝弗逝

蔣母易夫人墓志銘

閣學少宗伯蔣笙陔丈人既卒之二年其配易夫人以憂勞病
隔噎時愈時作又一年以是疾終其子元溥之侍疾也恆跪而

進食進藥不能咽則泣既而母子相持泣而卒不能進一匕元溥曰吾母以康彊之身嬰慘酷之疾天之抗我使不能致養於吾母也哀極痛溢令人不忍聞見歸葬有日持事略乞文其志墓之石余惟天門蔣氏自丹林公由詞林起家官躋卿貳笙陔公以廷對擢大魁洊擢內閣學士兼禮部侍郎元溥復以對策第三人及第再任少司成祖孫父子三世並時文衡相錯除日踵至科名簪組之盛爲海內所稀有顧其門以內刻勵勤苦不改寒素丹林公之配林夫人以懿慎清勤爲吾楚京宦所矜式夫人繼其姑之志益勵謹儉持貴盛布裳執爨身先婢媼日與親串語田里耕饁時事豈知有笄珈之榮紈綺之適哉門庭苑枯基於閭內夫人雖以積憂遭疾不七旬而終而其後祉蓋未有量已夫人生於乾隆四十有一年六月五日卒於道光二

十有五年六月六日年六十有五筮陔公諱立鏞之元配子元
溥女一孫可松可榕可桐可棟孫女一曾孫一曾孫女二筮陔
公與先文安公爲鄉試同歲生可松爲余弟紹祺之壻姻連世
交諗悉內行不辭而爲之銘銘曰

閑閤崇奕接魁鼎視其閨內朴愈謹不飾珩璫理曰并由天所
篤匪人警厥疾則苦德益靜我文其幽彤管炳澤貽孫子福祿
永

東洲艸堂文鈔卷十六終

東洲艸堂文鈔卷十七

道州 何紹基 子貞

碑誌

贈奉直大夫王君墓誌銘

代

君姓王氏諱槐康字以和系出唐王公仲舒始爲左拾遺與陽城合遇裴延齡爲相後爲江南西道觀察使遂家宣城昌黎銘其神道所稱志儒之本達士之經者也孫希翔爲楊吳參軍避亂遷歙子孫六世同居宋仁宗時旌其閭君爲參軍三十二世孫曾祖國慕祖文選五世同居代有隱德考洪烈武舉人以父病痺侍榻十餘年不與兵部試配方氏生子四君其仲也少英敏讀書通大義以家故寒素食指日繁又念自先世來皆以孝友行誼爲門庭根巨里卹矜式非屑屑文字爲也奉父命習賈

於京師刻屈自厲豪俠能任事伏其儕輩始浮海懋遷繼遂置
肆於潞河先後蓋十年意在操奇贏以養親贍族業甫成而中
道徂士君子莫不惜之以乾隆五十年卒年三十有一配方氏
國學生世濱女年十七來歸事祖姑事姑皆致孝聞君凶問勺
水不入口五日誓以死殉母歸諭以姑老子幼宜秉大節爲王
氏計久遠諸娣姒奉杯茗環跪始飲泣起兄方君口口爲作生
傳曰守節愼重自古皆然惟吾妹之遠嫌避忌有過尋常者行
不履人跡饌不食人餘有道及閭巷瑣屑輒掩耳與姦氏親愛
惟見於堂不入室至老猶不改子應矩曰吾父之歿也伯父叔
父邀親族書二百金券付吾母爲養孤計逮兒弱冠母以券還
伯叔謂藐孤可望成立無所需此其嚴正之性堅定之力雖古
節婦何以加焉年六十奉

旨旌節孝建坊距初守節時三十三年矣以道光二十一年正月八日卒年八十有四子應矩從九品銜縣殤孫茂蔭壬辰進士戶部主事茂蘭茂茹茂藹曾孫四人君以茂蔭官贈承德郎晉奉直大夫配封太安人晉太宜人以道光□□年□月□日合葬於中嶺之原□與茂蔭同歲成進士時相過從聞君志行及太宜人苦節甚悉因其請而爲之銘銘曰

新安王氏杞梓之里溯宋及唐越千百祀孝友行義代炳圖史君才伉爽不屑雕蟲棄學業賈匪墜儒風屈身養親命嗇志充婦節

天褒綽楔奕奕食不餽餘行不履跡本厥至行補禮經缺我貳春官禮儀職司紀實銘幽特表女師豈因雅故而爲飾詞

靈石楊君兄弟墓誌銘

咸豐六年仲冬月余僑寓濟南聞楊墨林子言兄弟之喪至自福山驚詫甚既而墨林之子善昉來泣陳始末余不禁噉然而哭歎爲人好善如此天乃吝其考終而子言之死於殉兄尤可敬可痛也墨林嗜古好奇上年攜子言爲東南游六年七月至上海而墨林病乃賃海舟北歸旋於十五日病逝子言載柩於舟三十日行至山東福山縣境遇暴風雨舟覆子言落水抱棺號呼惟恐棺之沒於海也幸獲抵岸子言已隨兄逝矣兩僕得不死爲檢理其喪子言非救兄棺固可延緣不死子言卽爲兄死於棺已入海何乃兄棺弟屍儼然出於風濤浩渺中天殆特以是彰其孝愛之篤不暇計其生死耶是非吾之所能測矣諸孤旣護喪歸將以七年七月並葬於縣西文殊原之新塋聞余至京師乞文其納壙之石余按墨林名尙文字仲華別字墨林

其弟尚志字子言世爲靈石縣人曾祖士藩

旌表孝義祖溪候選道父履復兵部郎中世有隱德漸豐其家
墨林屢踰省闈不獲薦援例候選同知晉階知府 賞戴花翎
君早失怙嫗壹奉母承歡侍疾不少離庭戶嘗曰吾非薄仕宦
也方奉親無此暇也門庭雍肅有法孝友之譽盎然於士大夫
間逮板輿棄養喪葬事竣年未五旬乃猶夷澹蕩泠然薄游竟
以是終矣鄉居時遷建家廟創立義學四時製藥以療病者起
卹嫠會月捐口糧家塾特設文課延邑中佳士優給膏火俾相
砥厲類是者難以更僕自道光癸卯余始建顧先生祠於城西
慈仁寺之隙地海內魁儒碩士治樸學能文章者先後至都游
集甚盛爲之職志者則余與張石舟陳頌南也墨林虛懷敬友
旣遍交一時賢儒因命子言師事余及頌南石舟又學算於鄭

浣香子言事兄如事父其尊師也侍立隅坐謹恪而懇至余直
史館每三六九日下直出東華門至所居春暉園甫入門則墨
林子言率子姪迎侍左右出閱古書畫導游果園酒炙駢進惟
恐其不當意酒後爲雜書篆分真行橫直大小盡吾興而止乃
登車出城去如是者六七歲以爲常壬子秋余使蜀道出靈石
過其張家莊里居次日墨林子言送我至霍州依依信宿悵然
別去遂成永訣矣家計中落墨林好事益不衰刻連筠籀叢書
十餘種皆發明經史裨益實用之書張石舟實爲經理最後刻
桂氏說文義證屬許印林校讐之書成而墨林子言不及見矣
子言肄書學算皆有門徑恆喃喃然如一無所知者受兄之教
致然也墨林生於丁卯年五十子言生於辛巳年三十有六烏
乎其可銘也已銘曰

兄愛其弟慎擇名師弟敬其兄跬步相隨涉江入海將以窺宇宙之奇豈意望洋而俱逝者天仍褻以悌友之實而不遂其汗漫之期獲歸故土聊可塞悲同阡合誌地下墳篋我規南游江濱海涯倘見浮天沃日之浪能不懷二子而涕洟

何母上官恭人墓誌銘

咸豐七年余由歷下暫至都門秋九月光澤何君踵門泣告曰秋濤丁母憂以避寇北來乃先生適在都是天與之緣吾母當待椽筆以不朽也乞文其誌墓之石余媿弗克任而誼不可辭乃受其狀而讀之按狀恭人姓上官氏世居光澤九都楊家里父金榜以外孫貴貤贈奉政大夫母何氏贈宜人恭人幼受母訓有至性習書史于歸樸庵君隨侍太翁禮門君於宛平饒陽博野等縣官署事禮門君暨邱太恭人備極誠敬禮門君一家

篤行兼尚風雅女淑蘋有詩聲所傳琴北詩鈔者也恭人樂與
唱和顧以文菽非婦職所重未嘗隻字外襮於人八角樓詩集
晚年乃出中多遠道憶父母之作或以婦人內夫家外父母家
爲疑余歎曰自古有不爲孝女而能爲順婦賢母者乎秋濤弱
冠掇科第官刑部奇慧博識有聲輦下一時魁儒碩生翕然投
分吾輩冷交數人時翩然集其廬庖薪無煙刀匕不鳴而杯盤
秩如坐客盡歡不知其口空蓋恭人實司中饋素性潔肅又喜
其子之所友多賢也秋濤齟齬時卽口授五經逮就外傳諸經
俱已成誦巨閤多來議婚恭人念適龔氏妹早寡又以節終爲
娶其孤女秋濤由刑部主稿兼覈秋讞每散直歸輒舉古人平
反恤刑諸事爲勸時以感應等善書爲家人講解優卹戚黨厚
撫婢甬自奉菲薄恆買禽魚以放生自迭遭夫家母家之喪悲

思惻摯絕少歡悰比年粵匪肆擾秋濤由皖撫奏襄軍幕旋乞
假歸恭人相夫子挈家南返閒關跋涉屏當勞瘁屢致末疾以
咸豐七年五月遽終於福州省廨年六十葬福州西鄉貴官山
之陽子秋濤庶子秋坤銘曰

我識博野於京兆衙今交比部文深誼加閱四十年母德不誇
勲慈一生楷式厥家文采韜閤內行柔嘉胡彼才媛競逞滂葩
我銘其幽樸不及華爲所感動不自覺邪

彭母黃太恭人墓誌銘

咸豐十一年春余自山左回湘彭君申甫從鄉閒來問訊慇懃
卽返曰吾母年高不能滯留城市旣復約相晤於東鄉之金鼓
塘導謁先丈兩峯公墓便至文家段書屋余敬問堂上恭人起
居知康強善眠食如半百許人嗣閱一年不見君來城蓋侍母

不忍覩離也同治元年閏八月二日恭人以老壽終年九十有六矣余因道遠又牽於事不獲往弔顧甚念君不置既而命其子樹本持書來知以其月之廿六日葬於文家段屋之左負土營築率諸子廬於墓次親友概不赴聞而句余文其納壙之石余以久不作碑誌辭乃三四致書哀乞不已烏乎親喪固所自盡居今之世有誠孝懇樸如君者余不覺懷感爲涕泣而敘之曰恭人姓黃氏善化文學開甫公諱孝萃女年十八歸兩峯公諱永思時四兄皆已授室翁姑以恭人有德懇令主家事既辭不獲日以孝謹聞後因屋狹析居命以大田老屋歸兩峯公特以恭人之善養也老屋者後唐同光中彭氏由廬陵遷長沙所卜居雖屢經修葺故址千餘年矣恭人善承重闡歡治蔬醢酒漿能出新意它人輒不能效非昏祭大事未嘗不躬治肴饌粼

氏之先逝者皆撫字其兒女撫馬氏孤甥如己子兩峯公由甲
科起家作宰滇南廉勤正直以強項稱恭人侍翁芳圃公就養
至暑胥役鈐卒皆感其惠兩峯公改官農曹恭人鄉居奉養兼
爲子延師訓課敦嚴有法申甫之克爲正士多由慈訓也已酉
壬戌湘中歲飢皆先諭申甫儲穀以備平糶籌車紡績至老不
倦曰暮年多龍鍾由不肯習勞耳吾以是扶衰也申甫有所與
游恭人謂面無善氣宜厚待而遠之後其人果敗近年申甫創
治家廟及書舍每扶杖監視工役婦道母道可謂得其大節矣
微疾恒化鼻垂玉筋葬處土暈五色結成文字如古篆籀高範
茂祉符應彰示不其異與申甫以道光乙未恩科舉順天鄉
試候選通判專意奉母不慕仕進女子子三孫男五樹本志本
序本豐本字本孫女十二曾孫二兩峯公與先文安公交契甚

篤余又與申甫鄉試同年以學行相勸聞母德稔矣銘曰

年近百齡夜猶績勞則善生墮於逸教子及孫率循壹福慶之遠自茲必天然文字覘壤吉灌溉後嗣神無隲視此銘詞美何溢

封朝議大夫吳君晉齋墓誌銘

君諱懷寶字晉齋世居休甯江潭邨祖絃隆無子兄紱隆有五子皆不當公意公歿後配朱孺人爲兄公置適室生二子皆爲公後次諱添福字景如君之考也配孫太恭人訓子有矩法君幼習勤苦能自樹立十三歲至浙務居積以養親旣丁父憂侍母回休甯本生祖暨祖妣生祖妣並景如公葬事皆獨任之習青烏家言得地皆有吉證蓋誠孝所致遷居杭州立家室治生業蒸蒸日上起豪舉有名稱或歲致萬金而家無餘貲忠告善道

士大夫爭與交晚年生計日絀稍謝客然解囊焚券掩骼卹孤
諸義舉未嘗少懈也太恭人棄養己未夏葬杭州三台山庚申
春輿逆陷杭州移避山陰之歡潭邨辛酉冬猝遇賊劫其衣履
君怒罵奪賊矛折之賊出短刀傷君顙項乃益憤竟撲賊蹈負
痛踰嶺遇四子觀治扶歸其秉性剛毅可想見矣壬戌春復避
至山陰移風邨徐氏外舅家次子觀禮脫難後尋至隨侍至甯
波航海入江延緣抵湘中先是三子觀樂奉母來湘居北鄉之
元豐壩蓋吾弟子毅葬山後又距吾母廖夫人塋域相近娣氏
汪宜人率兒孫守墓次昏姻洽比炊爨同之余因主講城南僦
居城內化龍池君至款飲數日卽移就北鄉田舍家庭聚首憂
患後一大慰事惜觀治觀誠二子竟在歡潭失散未歸也觀禮
娶吾三弟子敬之女彤雲丁巳夏歿於京寓以吾女韶雲爲繼

室閒關數年至是始得成禮時癸亥春正月也余旋有嶺南之行君遽於二月十一日以微疾告終距生於嘉慶戊午正月十六日年六十有六余寄輓詞曰險難賊中來擬結比鄰娛蔗境倉皇天上去愴令新婦著麻衣蓋幸其甫離艱阨而痛其逝之速也天性孝友弟用均久客閩中懋遷多折閱常矜恤之宗族鄉黨咸得其歡心言語真率然隱惡揚善人無怨者道光廿一年始嚴鴉片煙之禁蕭山令王君與君雅故胥役籍吸煙者姓名百餘人君正色曰某也枉某也枉王君始悉胥役之訛詐製戒煙藥劑活人甚眾有友人溺於是延至家守勸逾月不復吸食始送歸姚姓負豫賈金豫賈挾刀伺之跡至君所君曰姚君固匿吾家然殺人者死君將何爲豫賈大悟乞爲畫策則引令相見代立期限事乃解有甬東人失業游杭旣厚拯之後復游

夢乃招與同食同居若未聞知其人悔悟生平不佞佛恆夢至
一禪院榜曰天佑寺瀕危謂兒等曰我尋師父去矣烏乎其信
有前因乎丁巳歲除余省子敬弟於杭州始與君相見謂曰君
志業闊遠奈何以善飲名余爲悚然謂其傾蓋能直言也亂定
重逢冀攻吾短豈意暫別兩旬遽成永訣乎元配繼配皆山陰
徐公東揚女側室張氏畢氏嚴氏子五皆以能讀書名人謂君
植德之報觀仁杭州府學生張出觀禮已酉科舉人刑部候補
員外郎觀樂附學生江蘇候補知縣皆繼配出觀治畢出觀誠
嚴出女三孫二觀仁客游未返觀禮觀樂以同治癸亥八月葬
君於長沙北鄉檀木嶺西之官塘陂乞文其藏幽之石銘曰
新安之吳以浙爲家今來湘江何殊浙耶歌哭於斯餘尙天涯
東南肅清殪虎剽蛇久旅流離歸期匪遐九京有知宜免歎嗟

樞木之發噉雲吐霞胚胎圓暈厥壤孔嘉庶蔭後昆蕃衍洪姁
我文其幽有質無華

師君席聘墓誌銘

道光辛巳余與三弟由京師歸應湖南鄉試張掖垣太史師館
余兄弟於家席聘先生與吾師有姻連時相過從見余兄弟深
相愛重後每南旋皆獲晤兼與哲嗣笙陔茂才文酒嬉娛先生
恆顧而樂之咸豐辛酉余罷官回湘聞先生前三月壽終年八
十矣盛德高年顯有符應追思相待之摯情不勝愴惻也配劉
宜人亦以其年先逝越同治三年甲子笙陔兄弟將以八月合
葬於瀏陽北鄉焦溪嶺下持事狀乞文其窆石按狀先生諱象
珍字席聘晚字鏡齋姓師氏世居長沙明道都東山遷萬壽都
丁家鋪南沖曾祖元純祖開試曾祖母杜祖母楊皆節孝父道

一七齡失怙兄弟六人拮据奉母生計日薄先生年十四卽令棄書習懋遷漸以豐給兄象璆象瑞弟象瑤俱國學生先生躬行孝弟睦族和鄉里葺宗祠修族譜邑中公事如育嬰恤廢修學宮籌蠲賑諸義舉無役不從竭誠盡力服膺陳文恭公訓俗遺規營印百部存宗祠曰族中願領此書者勝於讀敬信錄也延師課子姪恆助之曰願汝輩學爲通人毋徒以科名重也六十後厭煩喜靜常閉戶不見客遇有奇花異木則畱憩欣賞輒竟日蓋其中有以自得也劉宜人長沙處士劉君金榮之女孝翁姑和娣姒戚黨無閒言君生於乾隆辛丑十一月廿三日未時卒於咸豐庚申十二月廿二日午時宜人生於乾隆戊申十月廿一日戌時卒於咸豐庚申八月廿六日卯時子儀卽笙陔宜人出附貢生咸豐元年舉孝廉方正候選訓導娶馬氏次子

傳側室喻出娶曹氏女二適善化鄭大堡長沙柳先賡孫德鑾
德鈞孫女五曾孫立極曾孫女一銘曰

其貌樸其行篤四十年聞見熟卜幽宅焦溪麓霏煙雲滋宰木

贈光祿大夫劉公神道碑銘

并敘

范蔚宗始立獨行傳補馬班之墜例以後諸史祖襲其意更有
孝義隱逸諸傳凡以闡繹幽光敦扶教本較循吏文苑尤爲重
且先顧家乘閭史浮詞溢譽秉筆者欲藉以信今傳後往往慙
焉今於湘鄉劉公得其翔寶確至乃敢書其隧道之石按狀公
諱象謙字虛谷又字牧庵其先由安化之古梅遷湘鄉之楊家
灘遂爲縣人世有隱德伏而不耀至公考卓齋公以古義律身
先正格言未嘗離手口生子四人伯氏象履道光乙酉舉人未
陽教諭叔氏象恆己亥舉人季氏象益國子生公其仲也蚤充

縣學生食廩餼九應鄉試不雋士林惜之生平以功過格約敷言行無疾言無遽色卓齋公棄養葺茅茨爲罔極廬與兩弟守墓讀書距家二十里每日歸省母蕭太夫人寢膳仍返墓所居母憂苦出墓旁哀泣之聲山中人不可聞見友愛篤至兩弟抑抑受教獲成名業道光初元闔邑以公名應孝廉方正

制科公辭曰孝廉方正求一字之無媿且不能況四字乎堅辭不就里人稱之曰是真可當四字無媿矣行古鄉亭介甲法邑中翕然從之莠民斂肅有王彥方孔仲山之風引掖後進先德器而後文菽子弟輩坐無交足行無曳履所居近楊市或終歲不見其履跡先業頗饒裕祭服外無裘帛纊繒大布道貌渾樸拯卹飢寒無少吝不信釋道屬纊時諄諄勸兒孫勿以浮屠法治喪蓋性既剛正又銳自刻屈思扶弼聖道爲人心風俗防檢

老而彌摯云生乾隆五十一年三月廿八日寅時卒於道光十七年正月初二日戌時配蕭太夫人事舅姑以孝聞合葬於巖頭楊家寨子三人嶽曙四川補用道嶽昭今官雲南巡撫嶽昕道銜卽選知府皆以儒生從戎積功勛被
褒遇致隆貴

推恩所自增榮無量謂非種德砥行粵宛鍾祥報施之不爽歟鄧湘皋丈輯沅湘耆舊詩各采行誼爲小傳嘗爲余述公學行公弟象恆與余季弟紹京爲鄉舉同年因更得其親躬緝性之詳蓋獨行孝義傳中人也嶽曙等來求銘銘曰

粵事之興庚戌辛亥行述狻狻沿江並海訖於盪平將二十載湘軍鬱起楚才大昌冠倫魁能萃於湘鄉三曾三李競爽旂常爰有三劉觥觥後起投筆棄觚風驅電駛皆名將姿功崇望侈

觀察在蜀巡撫於滇惟伯惟仲驂驥先鞭叔也領郡退處覃研
深山大川水源木本沿渚先德植深涵遠自卓齋翁聖賢關樞
至我牧庵益勵繩規孝思罔極徵車固辭鄉亭古法俗整風移
秉正砥邪蹈規跡矩楷式比閭嚴謹步武老成已謝餘芳尙煦
帝資良棟

追美哲人有賢伉儷並緝

絲綸鄉仰耆德祀社宜神我讀遺詩欽挹益久獲文其碑大書
紆肘金石吉祥附公不朽

封資政大夫吳公墓誌銘

公諱璠又諱文煥字倬章號蘊堂姓吳氏先世籍宣城宋寶慶
中遷合肥東鄉六家畝爲邑巨族五世鑑當明宣德時由進士
爲御史知南陽府六世璠由歲貢生爲潛縣縣丞皆名宦有聲

祖鐘以懋遷起家好施予臨終焚券數萬金鄉人至今稱毅齋先生爲長者父之泉有隱德公生而穎慧端慤師事范琴橫先生得修身之要遇事內省不苟言笑少讀書日二千言博覽強記以國子生屢躋鄉闈棄舉子業專意侍父疾藏書數千卷丹鉛點勘一字之誤必攷正之手鈔書至等身作詩由香山入王孟清矯澹遠脫盡塵俗性好游足迹徧皖豫燕齊梁雍所至有吟詠構未園與名宿唱和有未園詩集毀於兵火諸子檢存遺稿百餘篇而已見義必爲道光辛卯大水郡守劉公煜請主東鄉賑務李玉荃比部創建節孝總祠請專綜採訪事得數百人宗祠族譜咸獨肩其勞族郇化其篤行數十年無訟事有劉子相王彥方之風遇緝私鹽者立矛露刃隊百人過市歎曰天下將有事課諸子於經史外兼治兵家言軍興以來毓芬由廩生

帶兵江蘇以道員加按察使銜 賜禦剪巴圖魯名號 賞孔

雀翎毓芳由進士爲甘肅知縣以軍功升同知未及補官而歿

毓蘅以廩生率團練殺賊死毓蘭統兵勦擒得布政使銜 記

名簡用道 賞孔雀翎佔畢世家乃以武功競爽烜赫一時與

同邑李姓相輝映可謂奇矣每見輩將從軍諄諄以邀功妄殺

爲戒有捷音至見賀客輒愀然曰一戰功成郊原流血何以賀

爲毓芬收復嘉善城降眾數萬感其不殺之恩公適就養至蘇

降將等次第醵金爲壽咸固卻之毓蘭駐兵揚州勦之曰地當

衝要賊所必爭宜常如寇至不可一日忘備後果有悍騎數千

突至毓蘭截擊之生擒首逆賴汶洗東擒遂平仁心爲質沈幾

度務雖非親圍矢石何異身在行間爲 國家戡亂平二子旣

先逝毓芬毓蘭望雲情切先後解甲歸侍公喜曰時事漸平吾

志稍慰爾兄弟能恬於仕進日在左右吾可以婆娑風月矣優游晚福年屆古稀粵苑所鍾得天何厚也以同治八年己巳正月二十一日終於家距生於嘉慶四年己未正月初三日年七十有一配梅夫人以淑慎稱生子四女十孫男九既葬公於席家岡之新阡長孫兆楣以知縣需次江蘇進退不苟爲今撫部丁公所獎任持狀來乞銘銘曰

確乎其質淵乎其文勁正以和施予不恩庭誥所彰爲國樹勛階庭茂實歸美於君終返其宅席家古原幽光不墜玉潤蘭薰